



白雪

詩

卷

十



白雪樓詩集卷之三

五言古詩

錄別十二首

悠悠念往路離別從此長何以酬明德攜手歸
故鄉良時不須臾且復各盈觴仰視日月馳千
載互相望浮雲難獨留游子暮彷徨綢繆踰皓
首風波忽一方

其二

千秋一嘉遇此別安可知良時不努力賤軀欲

何爲晨風野蕭條浮雲西北馳河梁臨往路遠
望令人悲游子自有懷悠悠當告誰

其三

長思何益會久留何益歸行人悵明發褰裳路
徘徊嘉期能再至安辭渴與饑浮雲一相失千
里常依依我欲往從之送子東南飛

其四

秋蘭懷芬芳依依樹前庭春華不再盛枝葉皆
已零念昔二三子俛仰如流星羽翼一以乖邈

若隔平生徘徊顧四海誰能喻中情結交各有
時千載一濯纓離別不在遠日月從此征長當
爲路人獨無弟與兄尊酒可自慰願言崇令名

其五

乖疑起恩愛離別生歡娛念子非一身中懷難
久俱握手一相失奄忽秦與胡新知自言樂山
海日以殊行路方未央出門思故廬浮雲沒景
光北風悲有餘褰裳復四顧徘徊當路衢結髮
在戰場皓首爲征夫

其六

四海一黃鵠千里命其儔悲風厲胡馬躑躅鳴
相求何況同袍友從此遠行游離別無慷慨去
去且復留白日沒邊城回首望中州浮雲西北
飛河漢東南流視夜常苦早寒冬正悠悠明月
燭羅幃嚴霜切綢繆俛仰已自喻誰能不懷憂

其七

念當首往路千里邈已臨絲竹發高堂聽我雙
龍吟泠泠江漢流浮雲寒以陰長風激羽翼嚴
霜摧北林慷慨有餘悲新聲愴人心游子失相
視征夫淚不任中曲一俛仰從此無知音故鄉
一尊酒願言常酌斟徘徊戀景光忽爲辰與參
來者自非昔去者自非今

其八

高樓耿長夜攬衣歌且謠秋風一何悲游子不
得驕明月照空牀羅帷自蕭蕭三星旣隅列河
漢東南朝黃鵠正徘徊翩翩顧其曹故鄉邈千
里慷慨命同袍浮雲日西北安知心所勞携手

在須臾經時復漂搖

其九

河漢何皎皎衆星錯其間攬衣立前庭明月照
苦顏悲風中夜起蕭蕭有餘寒涕淚應聲零四
顧慘無歡往路信可懷爲樂及盛年游子不自
愛故鄉豈難旋

其十

黃鵠難爲群游子常苦辛念當從此別中懷日
以新清光皎明月遠望不可親高樓正蕭條徘
徊四無人上有千里雲其下起飈塵各言還故
鄉握手道何因

其十一

窮冬盛陰氣白日西南微征人常早寐皎月照
我扉故鄉千餘里中夜起懷歸干星駕言邁嚴
霜裂裳衣獨行無儔匹誰知渴與饑穹廬多悲
風蕭蕭邊草衰身在天一隅何得不徘徊

其十二

顏色無常好春華一以零悲風蔽地來四顧何

冥冥寤言懷往路攬衣從此興殺氣拳毛髮涕
泣斷爲冰仰視河漢星離如水中萍景光不戀
人游子豈遑寧夜依牛羊宿日驅駑馬行努力
及明時安能愛其情

又十一首

秋風旣蕭蕭浮雲亦依依四顧但他鄉游子一
何微駕言西北邁中道正徘徊客行無好懷萬
事不如歸

其二

三星跂相視新月拳素光兩宮高自出雙闕遙
相望雲霞絢河漢機杼成文章羅幃影四座華
燭搖中堂主人前進酒彈瑟爲清商流焱激長
夜殺氣隕嚴霜蕭蕭墮白髮翩翩曳衣裳男兒
不憔悴誰知在他鄉

其三

北風著枯林浮雲苦多陰紅顏日就衰他鄉日
就深別離起中夜對酒不能斟絲竹含妙伎佳
人懷好音眄睐適君意忼慨動君心罷曲一俛

白雲村詩卷之三十八
五
仰變爲游子吟念當事行役淚下難自禁

其四

秋風西北來蕭蕭勁百草蕩子無室家悠悠在
長道紅顏能幾時棄捐一何早對客發素書零
涕復盈抱上言故鄉好下言故人老

其五

冉冉年欲度秋蘭采間萎蕩滌千歲情結束欲
何爲美酒不誤人紅顏多所宜萬事自明日行
樂此一時四座慘無言游子中心知浮雲動悠
悠故鄉難可期

其六

悲風墮白日天地何冥冥招搖彈北戶河漢條
中庭征夫苦難夜且復命新聲方言動君子四
座無不清人生卽滿百長此千載名豈如飲美
酒趙女奏鳴箏忼慨盡逸響慰我饑渴情惟念
當離別翩翩渺獨征

其七

明月促曙光衆星西北移游子工早行起問夜

何其攬衣出門去長當渴與饑
荻藜穿我履嚴霜薄我肌
別離矜盛年老至不自知
努力事戰場淚下復無時

其八

浮雲滿天地蕩子欲安之
努力事行役棄置以爲期
少年盛意氣忼慨生別離
犖犖無根蓬翩翻中林
騅馬上不得語涕淚各纍纍
君但重自愛遠道歸有時

其九

秋風動千里游子何翩翩
早行多所懷忼慨私自憐
嚴霜覆四野明星出高天
涕淚一以下中道忽言旋
踟躕戀徒侶不知身棄捐
客從遠方來遺我繒綵牋
故人俱白頭安得獨盛年

其十

昭昭秋素景明月涵金華
清酒照朱顏中堂發高歌
游子在外單結交常苦多
別離動白頭人生復幾何
悲風搖枯林嚴霜攜女蘿
新知雖云樂不如早還家

其十一

高樓出浮雲零露綴綺疏明月照佳人清光相
有餘紛何下涕淚纖纖結素書願持千里心託
此雙鯉魚尊名不可處白髮難久居豈如及盛
年駕言歸故廬

古意七首

秋風西北起吹我游子裳浮雲從何來安知非
故鄉蕭蕭胡馬鳴翩翩下枯桑暮色入中原飛
蓬轉戰場往路不可懷行役自悲傷

其二

新人一何好年頗十五餘本自貴家子秦氏有
名妹故人行采桑值我城南隅顏色各精妙手
爪亦相如故人工紈素新人工笙竽笙竽未詎
央紈素色已渝人生無新故夫壻自言殊

其三

嶰陰有孤竹常含千歲霜截爲雄鳴管其音中
清商豈不在人耳世已無鳳凰新聲自一時豔
曲亂高倡安得日相御竝坐君子堂

其四

十五漳河女出身邯鄲庭絲竹妙一世織手何
泠泠清商有餘悲恍慨爲新聲中曲若無人含
意已獨明知音難再遇紅妝日夜零奪響發浮
雲摧耳不能聽

其五

英英天上雲不照濁水泥新婚日以親賤妾日
以攜繁聲出皓齒妙舞生春姿縞綦難爲容棄
如秋草萎妾念當羽翼乖依依卽路岐良人無古

歡妾自中心知

其六

中天起雙闕浮雲出兩宮馳道挺其間甲第羅
西東胡姬正當壚邀客過新豐朱脣含綠酒纖
爪扣青銅墮髻似無意紹繞一何工眇睠正愁
人流紈動春風雙雙羽林郎翩翩五色驄挾瑟
上高樓調絲方未終

其七

胡鷹一何勁北風一何高朔方士馬地斗酒命

白雲樓詩卷之三
九
同袍窮冬感四野大獵出臨洮盪石響深谷烈
火走平臯邊聲中夜起殺氣常蕭蕭積陰生戰
場白日慘不消草枯牛羊瘦雪盛狐鼠驕引領
望交河層冰正迢迢

詠古十六首

帝作大唐歌八伯奏卿雲鍾石興麓野人聲一
以論日月發光華爛然星具陳沈璧十二渚岱
宗乃于禋是時闢四門穆穆咸所賓

其二

綏綏塗山狐九尾不自多我往求平定念子無
室家明發興嶽庭乃身參洪波宗䟽事則哀祝
融揚英華玉牒沐日月素書出江河

其三

江水一何沛薄大趣歸處朝周過故墟宮室生
禾黍傷彼西山士採薇自相茹千載睹軼詩斯
人乃高舉

其四

白雲出山陵乃在天一方東土旣已洽徂西聊

白雲樓詩卷之三
八
徜徉虎豹自爲群
烏鵲列成行
惟帝立嘉命
諸夏發其祥
願言顧見女
中心以翱翔
刊石樹弁
茲千載遙相望

其五

杲杲熾日羽施施
掩飈游我車
旣已寫四馬
亦孔柔射夫
率原隰
君子循方舟
楊柳橐其鮮
鹿豕填相求
多士自允異
燕樂成
王猷駕言徂東
郊出洛朝諸侯

其六

白石粲南山
頽鯉麗滄浪
單衣裁及骭
縷遠從商夜
中起飯牛
任車自所將
爝火辟列星
上客爛生光
疾歌一不聞
何謂伯與王

其七

菀彼中林鳥
拚飛不集
枯齒牙一爲猾
公子良見圖
矯矯上天龍
霧雨旣已敷
子推獨耆乾
草莽空號呼
懸書下宮門
綿山聊與娛

其八

莊王構會臺
乃與雲夢鄰
東延洞庭石
涪陽激

清津趙魏方幸禍况此狼虎秦諫者七十二枕
藉以前陳時非一耕夫三楚訖無人因知沮溺
流用卽社稷臣

其九

駕言九臯澤攬彼漸水臺累且蔽荆岑絕流曲
池隈婉彼三楚士諫獵紆其才大雨忽盈河疾
風西北來洪潦起滔天隕雹激以雷商梁正綏
立僕夫行告哀孤虛無妄設熒惑諒爲災帝德
睠荒淫欲去此徘徊

其十

文駟陳大庭膳肉宿所修群婢一以盛君子乃
見咻孰謂彼婦口於中可優游聽蛄遂盈耳鳳
兮當何求斧柯不在手龜山鬱綢繆翱翔七十
國交轍奸諸侯狄水衍其波罔濟非無舟駕言
從吾好還轅息我陬

其十一

忽忽歲已莫大臺役方作太上美遨遊禾黍未
能獲滯穗滿甫田風雨殫零落相國一霑襟罷

酒不爲樂

其十二

貪吏常苦富廉吏常苦貧不見孫叔敖其子行
負薪五霸相代與主烈難爲臣令名有遺封餘
財喜没人寢丘雖言惡千載功無湮

其十三

闔閭爲無道厥欲如蛇豕薦食視上國乃政從
楚起昭王在草澤群臣不復紀使者哭秦庭七
日未得理入郢旣已甚丘隴行見華感茲告急
言誓彼同袍士賢臣亦多術存亡尤獨美

其十四

吳王旣棲越出遊包山湖道逢一丈人邀我洞
庭隅靈墟發深藏中有神禹書大文秘天地乃
傳百六初金簡歆浮景玉宇回璇樞科斗不可
辯鳥跡互盤紆精華一以洩厭氣直國廬顧見
二室顛三石方扶疏

其十五

薛公得馮驩門下知者誰十日居傳舍乃問客

白雲樓詩卷之三
所爲先生惟一劍彈鋏何其悲授室締高國驅
車出中達主人意已厭同列寧見推田文旣失
位傾身與持危片言悟齊主復相名益垂奇士
多侮世藏用匪可窺

其十六

中春陽和起嘉觀臨四方刻石頌功德從臣紀
攸長上以獻泰成下威六暴強郡縣乃作始經
緯不踰行薦號立大義昭設咸有章濯俗諒已
美刑名非恒常鞭葦出頑夫二世尋滅亡

雜興十首

伯牙負高操引曲輒入神從師蹈東海延頸四
無人洪波盪大壑悲鳥方號群白日坐失色山
林忽不分精氣一以變此調得其真世俗蔽聞
見千載遞相因遺世伎始妙絕絃多苦辛自非
鍾子期古道難具陳

其二

離朱不逆景師曠不逆風所用一以失化爲瞽
與聾轡策出大御繩墨出巧工顧眄卽千里結

構臨層穹束手寧自甘狗人道乃窮

其三

良材出大國群構集明堂樽櫨相支持榱桷碩
且長飛棟鬱雲興高軒間重梁衆人稱壯麗輸
子起彷徨柱小亦已撓朽蠹處中央迨天方晦
陰室家羅四廂行者苦無庥居者歌慨慷風雨
一漂搖不知僵路傍

其四

良馬躡路岐善言躡嫌疑稱樂自云早日月寢
已馳黃金不可作美酒多所宜清風響高唱令
德含妙辭

其五

太元秉經緯天地自生成陰陽遞消息四時相
虛盈雷雨鼓神氣日月宣華英網緼交二儀周
流列五行至和液甘露盛德厭攬捨唐虞具法
象明良熙穆清垂衣御三事大治無常名

其六

翩何漢宮女紅妝鬱熒熒本自良家子十五充

後庭是時得上意寵至身逾輕貴幸霸天下妙
麗傾人城詔許領椒房嬪御無不驚脣如齧丹
飴齒如鏘玉聲一當萬乘主常含中道情絕色
動千載旦夕誰見明美惡懸盛衰棄置視合併
所以尹婕妤顧眄失平生

其七

詭時苦難遇直道苦不華挈斲羸衆口繩墨矯
群邪所以上古人工拙無常家陸沈金馬門醉
卽據地歌世久自相玩爲德一何多在群旣纍
生孤貴亦失和首陽與柳下一龍復一蛇同流
雖所願跡邇心則遐

其八

鴻鵠一以舉四海何悠悠局促人間世豈若遠
行游明時不重至中懷難久留遇合成佞倖美
女多所仇英雄旣失據片語解綢繆所以孔仲
尼舍車卽于浮

其九

洞庭大張樂千乘朝崑崙在昔有行幸軒穆一

何尊樓船下河東羽衛覽西垠風起白雲飛隴
首望中原蕭鼓發哀情長馳掩回轅入齧妃女
脣出接詞客言

其十

名馬不受羈足下有千里黃鵠不受羅羽翼就
四海貴賤自一身出處無二軌時利適愚夫勢
衰蹶智士祛長不握臂屨縮不截趾陸沈人間
世悠悠日復爾

君子行

君子美百行維日服厥裘車奔不易度火滅不
改容垢言一生口盥漱難爲工金多徒自穢重
名撓直躬幸勿少須臾無替功乃崇九淵可浮
游所患溺愚蒙

古詩後十九首 并引

前有十九首故後言之猶稱古者其
文則十九首也其文則十九首而以
屬辭辟之制轡筴于垤中姿意於馬
使不得旁出而居然有一息千里之

白雲樓詩卷之八
十七
勢斯王良造父所爲難爾

其一

行行萬餘里依依夢故鄉見君累長夜携手立
彷徨寤言心尚爾忽在天一方越鳥東南飛胡
馬鳴相望眴眴人自好棄捐人自老徘徊亦何
益努力苦不早思君度餐飯歲月漫浩浩慷慨
卽別離故鄉勿復道

其二

搖搖車馬客依依燕趙女霑霑倚箏立交交夾
窓語盤盤高結出颼颼中帶舉浮雲忽心自歸蕩
子漫無所天寒錦衾薄空牀難獨處

其三

白石何歷歷松柏何離離人生天地間一日不
可知斗酒無常置良會無常期沈吟厚與薄爲
樂無乃遲宛洛美遊戲冠帶自相隨宮闕起雲
中第宅羅四垂王侯負貴氣佳客以盛衰君但
視車馬攬策振其綏

其四

良會屬今日彈箏倚新聲唱苦令神傷三變不可盈中曲忽自置躑躅一再行欲因更促柱難爲聽者情人生局一世悠悠終何成要路多坎壈先秋慘其榮來者率如此焉知千歲名

其五

三五樓士女徙倚當雙扉紅妝妙一世誰不攬容輝絃歌入青雲新聲亮所稀千載爲一彈含意有餘哀知音難再得且復立徘徊終日不成曲零涕霑裳衣三歎令人老游子何時歸

其六

燭燭芙蓉花擢擢采蘭婦懷袖忽已盈馨香誰爲有秋草一以萎此物難獨久馳情一水間無因携素手

其七

搖光加孟冬北風何慘慄寒至踈衆星蟾兔亦早缺四時旣潛移遺迹難獨列不知空牀下蟋蟀安從出宛洛多故人厚者如膠漆及其據要路負我道非一織女無成章牽牛策不發且復

守貧賤振翮各有日

其八

浮雲何冉冉亦在南山阿千里遠徘徊游子苦
無家昔我同門友策馬驅高車兩宮屬眄睐冠
帶日透迤致身及盛時結附一何多極宴累長
夜重闈發絃歌白露忽以零迫此蕙蘭花芳草
隨飈塵誰能顧女蘿

其九

獨鵠西北逝逸響一何哀念當生別離欲去復
徘徊不惜寒氣厲但傷羽翼摧我有鴛鴦綺無
衣誰爲裁

其十

眇眇織女星當機理紈素牽牛能幾許常爲投
杼誤紈素欲遺誰終日西北顧負軛復何時軒
車歲云暮攬衣卽河漢躑躅不得度

其十一

高樓出西北下有故鄉道浮雲蔽天起回飈響
秋草四時更相至人生自著老傷彼遊子顏戚

戚難獨好携手不須更棄捐一何早努力以爲
樂泣涕復盈抱

其十二

東城屬浮雲阿閣百餘尺歲暮多悲風游子衣
裳薄四野何蕭條所遇但遺跡來者自爲今去
者自爲昔盛年奄已衰含意將安適燕趙出名
倡紅顏照宛洛結束隨時變絃歌日相索未彈
理懷袖若在遠行客弄指一何妙列柱一何迫
清視雙燕飛入王侯宅

其十三

磊磊丘與墳鬱鬱郭北地白日松栢陰悲風四
面至誰能黃泉下永含未伸意悠悠卽長夜千
載一以棄漫漫待明發迢迢正遙寐身世非膠
漆豈得常相寄此物無賢愚萬歲更相致神仙
不可知服食苦中置美酒與佳人携手行遊戲

其十四

郭北一極望徘徊安所如新墳歷歷出古墓附
里閭薪者躑躅歌棄妾迴其車白楊日夜踈蕭

蕭悲有餘三歲去故鄉一字無素書

其十五

處世苦無見孤生非所憂高言唱同心千載一
相求窮賤解膠漆棄置衰交游昔我同門友上
書哀王侯明月皎夜光躑躅不得投

其十六

迢迢月既望白露被庭中越女前理音燕服羅
清宮交游自遠方文彩復無雙駕言出廣陵將
以適曲江聊慄此何氣攬觀不可窮帷車蔽日
下萬馬悲回風水力率已至神物難爲容秉意
屬南山浩蕩惟所從上客變其度陳唱誰與同
極命以成章娛樂良未終

其十七

孟冬風已厲攬衣有餘歎獨宿知夜長遠客知
天寒河漢直雙闕皎若素與紈黃鵠從西南孤
飛正漫漫一鳴緩中帶再鳴霑玉顏遊子不可
聽令君中道還所以生別離慷慨亮爲難

其十八

客從洛浦至遺我合歡衾中有長相思緣以結
同心芙蓉發文彩鴛鴦屬哀吟遊子正無衣天
氣復已陰故人此屬意徘徊獨至今

其十九

皎皎羅帷月攬之有餘輝寤言守長夜依依未
能歸故鄉無不可道路亦何爲客行各所懷誰
知我心悲出門一以望浩蕩霑裳衣

白雪樓詩集卷之三

白雪樓詩集卷之四

五言古詩

酬皇甫虞部

青陽一何麗
冉冉西南馳
言念庭中樹
率已萎華滋
昔我同心友
懽宴及良時
携手理清曲
各謂無人知
天衢多高足
冠蓋自相隨
所願不與俱
朝親夕生疑
含意戀明世
皓首爲君期
諒茲久識察
紅顏坐盛衰

寄許殿卿

西山匿冬日北風悽以繁念茲歲方晏徘徊白
雲垣俛首事尺牘儻石聊自存悠悠塵中心夙
昔非所論感彼碩人情獨歌矢弗諼庶此涉時
艱遂用安丘園路傍磬折予高足策華軒咄咄
金蘭客來當蹈斯言

賦得何仲默

仲默自天秀弱齡負遐矚十六遊京邑藝苑策
高足揮毫坐華觀懷人理清曲歸來放情志日
晏從所欲結好玩遺芳明德以相勗古道諒寡
諧遂令傷局促

五子詩五首

王元美

元美何翩翩夙昔秉靈異京洛多冠蓋操觚各
自媚所遇無此物識曲聽其僞大雅久沈邈時
澆作者至俛仰知音稀含茲未伸意但坐奮逸
響側身向天地虛名喜誤人依依千載事浮雲
相攬持白日一高視四顧命儔匹中懷誰可致
凌厲子長氣文章此未墜

吳明卿

吳生蕩滌士明德復何早高舉凌風翮青雲漫
浩浩良時冠帶會斗酒弄辭藻一彈中清商下
里難爲好知音率已稀穩几存吾道衆言紛盈
庭膠漆各自保掩耳走淆亂褰裳度潢潦罵坐
豈盡狂流俗令人老陸沈金馬門懷袖諫書草
白日有弃捐遊子悲不造

宗子相

婉婉維楊士早歲絕人識結撰有至思先民乃
遺則時俗徒嗷嗷此物知者得鬱鬱獨往心百
折江河力披覩他自媚我意安所測念茲携手
驩榮名與令德浩蕩陰陽移吾道相終極語及
千載事愀愀動顏色中懷誰可喻文章亦經國
一爲麟鳳言三歎加餐食

徐子與

徐生一何俊本自清雲姿十年住天目含意多
素辭旣聞風雅音三歎文在茲眇眇生榮名徒
倚卽前綏念爲理清曲高言倡者誰躑躅流俗

白雲樓詩卷之四
間携手不相疑時髦滿要路各謂中心私世人
豈同願吾道欲委蛇黃金買大藥朱顏庶可持
物理率如此和光難獨窺

梁公實

梁生起南海負氣何倜儻北交中原士徘徊得
吾黨高名豈宿著一朝奮鴻響時俗旣淆濁振
衣念獨往禮法難爲工局促向天壤王喬可等
期服食理非枉引領還羅浮願言稅塵鞅俯視
大河流逶迤浮雲上盛衰隨物化世情自鹵莽
吾意當告誰黃金妬偃仰

二子詩二首

盧次楸

盧柟起河朔本自千金子蕩滌諸生間銷骨於
積毀世無臨卽令焉得心尚爾深文類繆恭罪
罟中狙喜乃繫黎陽獄十年攻一技旣出浮丘
賦始知有株累三嘆不同時帝曰付諸理寥寥
相如後誰能識察此

謝茂秦

謝榛吾黨彥軼軻京華陌黃金自不留朱顏亦
已擲韋布豈盡愚咄嗟名士籍握手金閨人中
情多所適冠蓋羅長衢染翰日相索遂令清廟
音乃在褐衣客一出遊燕篇流俗忽復易還顧
望鹿門矯矯青雲翮

酬元美二首

妾本秦宮女少小揚蛾眉早辱君王寵朱顏驕
自持卷衣皆羅紈明珠縱橫垂頭上翠琅玕爵
釵珊瑚枝盛年處深殿容華天下知一朝在里

巷遂爲生別離此身託古歡南山猶可移東隣
蕩子婦泥沙委路岐中心指秋日同穴乃所期

其二

有鳥名黃鵠乃在琪樹柯下來太液飲唼喋行
與荷周游視中土少年多羅家金衣菊爲裳不
受矰繳加一舉絕四海離哉天可摩毛羽未摧
頽鼎俎柰爾何

再答元美二首

盈盈倚蘭花深谷何逶迤秋風凋奇樹隕穉以

白雲種詩卷之四
五
歲蕤含英卽蔓草不復揚華滋豈無王者香結
根非其宜孤生感霜雪采折中心知幸君置懷
袖慰此長相思亭亭西山栢自茂凌寒姿下流
難久居壯士多所悲

其二

采苓首陽巔青蠅止于棘結髮奉歡宴栢舟矢
靡慝上堂理琴瑟下堂視蠶織昵若形與影在
遠復相憶豈不防未然萋斐成罔極愛深生百
憂棄捐衢路側賤妾抱區區中道蒙察識琴瑟

聽其真蠶織五文色非君膠漆心群小志亦得

郡齋同元美賦

遊子苦行役驅車自溟渤依依平生親斗酒日
云沒秋風亦已厲蕭條衆芳歇何以贈君子徒
倚攬明月燕婉當及時霜雪變華髮高足蔽天
衢浮雲望雙闕令德一見疑積毀能銷骨中懷
不復喻邈若胡與越綢繆有故人知音無倉卒
常恐遠別離含意向明發

送元美二首

有鳳銜靈文栖栖北海湄臨流理毛羽五采以
自竒飛如摛群星擊若朝霞披翱翔千仞岡亦
集梧桐枝一鳴叶清廟再鳴中咸池淒風振大
野青雲顧我悲世無伶倫耳誰爲度參差回首
顧丹穴摧藏不可持將止帝東園恐令鷓鴣知
阿閣在萬里哀號乃見疑啁啾榆枋間燕雀相
追隨清光蔽白日何當復來儀

其二

夙昔二三子慷慨揚竒聲文章凌先秦詞賦無
西京零落如流星各懷饑渴情念爾策高足北
海日以清顧眄當中原冠蓋徒縱橫明發詠蓼
莪依依戀所生悲風薊門來涕泣霑我纓解帶
謝時人驅車薄姑城千里見大河躑躅浮雲征
罷酒不能別蕭蕭駟馬鳴骨肉非一身意氣乃
合并景光老自愛率已識榮名

答寄俞仲蔚二首

太乙貺漢德名駒生渥注赤汗霑青雲長嘶振
流沙饑斃玉山芻渴則飲其涯翹尾以躑躅駟

白雲詩卷之四
駮相經過不願游閭闔况乃服鹽車世豈無伯
樂垂耳柰我何天子發素書使者出蹉跎駢駢
十二閑駑馬常苦多雖有千里姿羈絆非所加

其二

鬱鬱龍門山下臨千仞谿孤桐生其間幹與浮
雲齊湍水擊其隈迴波蕩其涯野火燔其東飛
雪塗其西莫則止黃鵠朝則啼鷓鴣悲風從天
來清商以淒淒伯牙不能去傾耳中自諧匠石
空扼腕運斤路何階琴瑟和神人無乃非其懷
結根旣已異雨露難獨垂願言俯大壑徃就長
離棲

送李明府入奏

西北夏雲列飛蓋亦相望供帳被城隅父老皆
扶將天子秉百度作新大朝堂棖桶曼且碩掄
才自南鄉山河俯壯麗肅穆垂衣裳是時薰風
至五月開未央旣奏解愠曲或和斯干章聖顏
慰饑渴帝心簡四方冢宰上績書召見伏明光
用等課高第視事稱維良小臣奉威靈不得施

其長誰謂一邑輕治行乃無疆願言備侍從珥
筆述陶唐策勳諒有期遺愛匪可忘

許殿卿郭子坤見枉林園二首

明時再嬰疾隳官此悠悠求言命沮溺二子乃
從游田家何所有樽酒結綢繆散髮坐園中輓
轡牽寒流擊我青門瓜聊且充庶羞雨氣蕩暄
濁披襟御南樓開軒納山色餘映一以收雲霞
羅四隅烟火蔽林立伏陰秀禾黍餉婦媚原疇
西望華陽宮若見清河舟登臨信亦美曠然銷
人愁願君愛景光多暇還相求

其二

佳客卽良夜此會安可期結髮爲兄弟晤言今
在茲層臺挺浮雲河漢宛其垂積陰濯列宿三
五正參差前山電影亂雨勢坐已移皎月出平
陵徘徊當照誰清光澄暑氣颯若撤長帷潦水
明樹間流飈澹華棖零露響空林蟋蟀以鳴悲
世路良獨難斗酒多所宜達人忌榮名千載同
一時

抄秋同右史南山眺望

南山有幽意駕言此徘徊湖波蕩寒城四座清
光開金天澄素景秋氣何悲哉繁陰遞白日浮
雲間往來落木颯中林流焱激巖隈朝昏上煙
火原隰被樓臺故鄉無滯滯世路多塵埃念我
平生歡離思壯難裁

九日集殿卿池亭分賦二首

卜幽命詞客冠蓋至如縻白雲澹蕭晨黃花媚
新醞灑翰湖山清開樽魚鳥近零露偃池荷淒
風攜籬槿徑回片橋出林暝寒城隱臨流濯長
纓飄然祛塵坻

其二

寒空鵲嶺秀霽野湖水闊墟落散城隅池亭入
幽豁雲陰出水鮮石色含霜活白鳥下煙際歸
鴻起天末返照欸長林群流亂相聒紫蟹壯可
持濁醪美堪掇秋高吹臺興老劇文園渴佳節
有獨醒吾生豈云達

集張使君別業

白雲樓詩卷之四
清河迅寒流金輿沓空翠秋氣下高原蒼然西
北至返照散踈林蕭條烟景異零落復佳期茅
茨况幽致握手平生人笑談出往事舊游數子
盡風流吾黨備千金抵白髮一醉滿君意

秋夜白雪樓同許右史襲茂才分韻二

首

林烟旣曳綃湖霞亦披絳鷄犬靜荒村蓬蒿翳
深巷燒微見月出鍾清識霜降各稱浮白樂未
覺呼盧驚更賦梁園雪如流華渚虹預愁還城

邑車馬紛相撞

其二

返照入平陵白雲出西隴天清鴈影澹山空嵐
氣重三徑何蕭條高人乃接踵諸生稷下秀詞
客梁園寵松菊有佳色琴樽亦從憑但醉不須
眠寒燈坐相擁

送許史得第字

秋風一蕭條白雲自相綴翩翩爾曳裾慘慘吾
分袂鼓楫大河流揚帆下衡衛平臺壯登眺鄒

白雲樓詩集卷之四
十一
枚儼兄弟既出兔園篇頗兼子虛製詞賦有知
遇王門卽恩惠

集開元寺

流陰拂層岑返照翳深谷古寺入蕭條迴巖抱
幽獨梵影淨香臺鐘聲殷石屋絕壁棲禪誦懸
崖下樵牧秋花雨還瘦老樹霜逾禿寒泉可坐
心白雲况極目登臨客自佳搖落時何速蔬色
蕩腥羶苔光清簡牘新詩發神秀舊游耿初服
歸來杖屨便老去煙霞伏高城出睥睨燈火通
林麓言旋轉多興後期此同宿

白雪樓詩集卷之五

七言古詩

送靳潁州子魯

華陽館前桑葉飛
 荆軻臺上送將歸
 為言擊筑悲歌者
 當時酒人今是非
 太守褰帷薊北來
 燕山忍斷楚天開
 郡中曉月雩婁出
 霧裏秋濤桐栢迴
 黃金璽書發明光
 東走潁州西豫章
 君家兄弟二千石
 承恩不數尚書郎
 朱轡雙出領專城
 五馬踟躕五馬行
 漢主乘春徵計吏
 小馮何



讓大馮名

送新喻李明府伯承

爾昔紅顏客薊門獻書不報哀王孫一朝致身
青雲裏座上還開北海樽余亦題詩郭隗臺燕
山秋色對銜杯論交共惜黃金盡此處空悲駿
馬來可憐郢曲今亡久下里之歌吾何有文章
稍近五千言雅頌以還十九首才子新傳白雪
篇江城忽借使君賢那堪西署爲郎者多病離
居卧日邊

贈張子含茂才

憶昔中丞全盛時少年裘馬相追隨忽逢世變
夙心違逆旅荒涼舊識稀古來萬事皆如此何
用空悲昨是非流水無情白日速紅顏猶在黃
金微飲君莫辭燕市酒欲行不行重携手青雲
今有故人存好贈綈袍哀王孫

刀斗篇

陰山戰合胡天黑漢兵大呼單于北邊秋日落
五原屯磧火夜連千竈食驃騎橫戈拂鉄衣悲

風黃草白榆飛渡河鳥陣旌旗伏卧壁龍沙鼓
角希征人馬上援枯骨滿地清霜刁斗發朔氣
遙傳瀚海雲寒聲亂動輪臺月掩笳騎虜聽垂
泣按劍材官怒指髮宮女琵琶咽逝波使臣旄
節彫幽窟誰能絕漠掃妖氛哀響如今不可聞
六郡少年思轉鬪推金猶憶李將軍

送張子參募兵真定諸郡

薊門昔在胡塵中匈奴火照西山紅氈廬相望
赤縣溢腥羶未厭神畿空君王拊髀過郎署侍
臣扼腕談邊功每飯不忘鉅鹿戰千金先發華
陽宮邯鄲少年游俠子腰間匕首懸秋水出身
願屬羽林兒橫行誓奪單于壘騰裝夜別縱博
場貫酒朝辭挾瑟伎馬上風雲八陣成帳前鼓
角三軍起故人新貴寵軒墀亂後高名衆始知
國士漸看投筆至主恩况許請纓爲天寒恒嶽
倚長劍雪滿滹沱擁大旗歸來漢苑生春草見
爾論兵散幕遲

齊俠行

簡書八道發明光詔徙群豪赴朔方神武臨軒
眈虎視將軍秉鉞鬱鷹揚山東十二諸侯國海
濱五百義士鄉厭亂齊臣思定伯殷憂漢使出
勤王敵驕擬縱田單火客憤能飛騶行霜殺騎
人人白羽箭民兵處處綠沈槍九河寒色旌旗
動岱嶽秋陰鼓角長各倚少年輕燕額曾經遣
戍守漁陽被髮左衽豈受賜排難解紛不可當
往歲潢池先陷陣三時大戰銀冶場功名未致
有莊賈肝膽欲傾無子孟嘗天子只令顧西北男

兒俠骨埋邊疆

賦得金谷園障子

誰將金谷傳毫素座上無人不回顧年展旋驚
澗水流纔開已識河陽路四壁直看片錦圍中
庭如見雙鬟度移席休臨墜妓樓解衣欲掛沙
棠樹彷彿明妃出塞吟聽來未必梁塵誤詩成
酌我我豈辭便過三斗無論數綠珠安在恰當
壚似留且往勢可呼意慘崑崙紫窳蓀色寒滄
海紅珊瑚君家富貴合如此此時那知有障子

縱然客散掩空堂猶聞夜夜春風起

送申職方謫萊州推官

嫖姚三疏奏明光九月王師掃大荒不求十萬
羽林騎從軍但請尚書郎看君未是侯門客草
檄論兵一當百片言不合徑拂衣坐使元戎氣
蕭索漢主臨軒送逐臣褰帷海上及行春正逢
匹婦銜冤雨一洒浮塵不污人遊燕曾携短七
首袖裏虹蜺今在否出關若見棄繻生爲余持
贈單于走

送趙員外行邊

孤白之裘紫騮馬鳴鞭東走漁陽野自言

天子授長纓明光殿前三使者飛檄遠度桃花
山昨日遼西校戰還吹律春風回黍谷揚旌暮
雪灑榆關關門一望煙塵色抵掌志馳伊吾北
豈獨秦人重繞朝誓令羗虜避充國此行不按
督亢圖欲畫地形取匈奴指揮千障鐵如意出
入雙鞬金僕姑驃騎將軍綠沈甲鷓鴣大夫黃
石法蹟裏兵屯種玉田雲邊燧起彈琴峽元戎

幕府贈吳鈞太守離歌岐麥秋看君歸奏稱上
意何足道哉萬戶侯

賦得狼居胥山送李侍御

材官十萬絕大幕踰河一戰胡兒却夜縱翼兵
襲章渠繫以往封狼居胥姑衍山頭列旗鼓中
壇擁燄陳首虜帳前面縛三當戶驃騎將軍醉
歌舞北風千里雲摧顏瀚海波濤蹴日迴漢家
天子雄才哉捷書親發柏梁臺君持繡斧五原
郡牧馬單于不敢問黃沙白草寒冥冥今年爲

王梨二庭

送徐汝思郎中入蜀

岷江東流何渺茫仙舟西去指華陽峽深當畫
暗雷雨白帝青天豁大荒一望我眉山上月風
吹寒影墮瀟湘益州部裏占星使草色春時接
夜郎客將河漢支機石歸自乘槎歷七襄萇弘
碧血埋難化杜宇啼魂怨未忘胡不爲我排閭
闔願君致之北斗傍卽今叱馭九折坂金精元
氣參翱翔雪峯突兀三飛梁中掛鳥道通蠻方

司馬長卿子虛賦其文可以陵太蒼臨邛小監
揚得意亟薦詞臣謁建章後來此事益窳冥燁
塵萬里遙相望

葉舍人

舍人家世稱儒素供奉班聯起居注仙郎盡識
鳳凰毛父老相傳驄馬步當日蘭臺抗疏還讀
書高卧柳亭山至今猶憶張文紀年少官微犯
帝顏聞君夜入蓬萊直歸夢時時動秋色翰染
金莖彩露寒廬開玉樹青天逼回首南雲春事
繁浮丘峰下小桃源他時搖艇新安水坐把江
花醉故園

送謝茂秦

孝宗以來多大雅布衣往往稱作者謝家玉樹
操郢音其曲彌高和彌寡寓梁曾曳王門裾遊
燕欲薦中涓馬豈無冠蓋映當時滿眼悠悠世
上兒文章千載一知己交結何須鍾子期此物
有神兼有分富貴浮雲不與之盧楠坐銜越石
恩醉後感激肝膽言蒼鷹睚眦鸚鵡賦身挂羅

白雲樓詩卷之五
網何由翻殷憂楚奏秦庭哭遂雪黎陽國士冤
歸去東將釣滄海安能貧賤常丘樊早借江鴻
報消息或卧春雲且故園

送太醫令周一之從大將軍出塞

武皇按劍明光宮夜發材官六郡雄臨軒親遣
上將軍誓掃匈奴成大功白羽九邊傳漢月霜
戈千里排胡空轅門豈聞天子詔帷幄寧多策
士風書記翩翩爾其選志勒燕然禪姑衍業許
原嘗念已深情憂平勃交仍淺藥囊每擬提荆
軻驄馬何曾避桓典淮陰惡少舊相輕朔方健
兒知姓名身為揖客元戎府意氣秋高出塞行
二百年來無一戰今日王師遂北征便當滅虜
始朝食不繫單于不解兵

南溪老樹行

老樹橫溪十畝陰下有跳波三百頃酒罷捫蘿
坐其上白眼青天何不逞牛斗之間見浮槎蒼
茫宇宙成漂梗念我平生湖海客衣裳泠泠風
馭冷文章八代俱望洋心事幾人同哀郢醉裏

誰堪此陸沈俠來氣與千濤猛洛浦明珠舊寐
寥渥洼神駿空馳騁翻然大叫觀者摧那知世
路滄洲未投足還探河伯宮俯身欲拾中流影
驪龍蜿蜒垂霧雨虹霓繚繞含光景須臾力疲
神亦眩乾坤低昂發深省最竒披髮泅吕梁願
言洗耳臨箕顛初看長駕出鼉鼉豈云吾道終
蛙黽王郎驅石到渤澥徐子招招迴舳艫此時
共濟失狂瀾却悲胥溺情難整泥塗詎可困豪
俊男兒相逢誇項領遂憶鳴鞭昨夜歸湘娥漢
女猶延頸群靈至今未敢散寒江颯颯開塵境

送公實還南海

梁生偃蹇誰與倫梁生偃蹇無與倫爲郎十月
不厭意上書乞歸南海濱文章往往迂時好富
貴安得嬰其身獨存肝膽論交者一一凌雲作
賦人憶昨擊筑飲燕市酒酣以往氣益振黃金
之臺空嶙峋華陽之館摧爲薪駒駉駉耳俱良
馬劍客博徒皆俊民梁生徐生情最親宗生王
生詩更新經過但坐歌白雪罷曲彷徨若有神

揮毫夜夜搖星辰襟期矯矯何能馴梁生此事
成萬古欲別牽裳遂具陳羅浮之山何崔嵬下
臨莽蒼波濤開維舟跋浪長鯨出倚杖垂天大
鳥來北望中原寥廓哉飛崖坐攬百粵色群峰
黝渺行風雷梁生之廬構煙霧千尋薜荔青摧
頽有時高咏反招隱巖壑無人秋雨哀尉佗椎
結本趙俠陸賈縱橫亦漢才丈夫有道在龍蠖
還能與世相裴徊梁生何爲終蒿萊梁生慎勿
終蒿萊

擊鹿行

并引

余往與王生過子與見伏鹿於庭戲
相謂曰余將携徐夫人匕首刺此鹿
麋腊之也生豈不願爲我掎角之哉
又與王生過子與則子與刺殺此鹿
食王生旣而宗生亦至相與批脯飲
也亦大豪舉哉乃各賦擊鹿行壯之
矣

徐卿意氣殊不偶買鹿百金求其牡華堂燕客

忽自放醉把邯鄲鐵匕首須擬麟從帝數游未
聞鹿觸匈奴走高材吾黨復誰過文章矯矯驅
群醜失日難將四海求逐來定死諸公手毛灑
旋疑霜雪寒角摧更見珊瑚朽王郎大叫奉銅
盤接飲其血軟以酒顧我前呼歷下生與君相
愛爲君壽舊時疾足今能否安得新詩滿人口
須臾碧眼胡兒至落碁脯腊無不有下箸已畏
翠釜空纖羹更出青閨婦衆看機上肉如陵覆
蕉尚在隍中守嗟乎曲士夢何久徐卿獨醒可

與友

送元美

王生二十趨明光是時作者不可當世上之名
他自誤須君千載垂文章夙昔陸沈秋憲府風
塵慘淡尚書郎心知此物難再遇片語論文燕
市傍携手七陵朔漠色悲風九月吹白楊居然
宇宙見雄俊睥睨今古神飛揚流俗紛紛失觚
膽那能結客聲利場近日操觚滿京洛江河決
注非其長家握靈珠戶和璧及逢周客皆深藏

高才梗楠與杞梓吾道麒麟或鳳凰清廟遺音
壯昭代天庭火藻懸衣裳生也經綸斯濫觴混
塵安取金躍冶養銳更羞錐處囊伊周屈宋儻
易地鈞衡藝苑俱稱良生也爲情誠徜徉但願
右挹擊筑之荆卿左拍接輿之楚狂二豪侍側
乃裸羸四子講德如蜩蟬舉觴白眼天茫茫秋
風胡爲歸故鄉亦欲送生從此去留生不住悲
河梁彩虹千尺挂碣石贈生千里爲帆檣

楊山人四首

茗溪之水何泠泠吳山一峰天目青千林萬壑
子雲亭從他世人還解事白頭不厭太玄經

其二

吳門市卒能逃名長安貴人非其情南山薄田
春自耕盛世爲農亦足老少年何用隨諸生

其三

千籠湖綿白雪開滿江稻色黃雲來山中客醉
領其顛自言七十岩耕者帝於我有何力哉

其四

長裾不爲王門賓千金盡散江湖人菰城一卧
三十春看爾紅顏逐燕雀終然白髮行風塵

送子相

自作白雲卽未厭滄洲意偶然薄祿混風塵論
交千里賢豪至元美翩翩多竒氣南越梁生亦
雄視二子招携從此逝爾今卧病緣何事綠鬢
還鄉已壯遊錦帆十月下揚州移家好住昭明
樓種瓜莫羨東陵侯文章萬古垂大業富貴浮
雲非所求知居林壑百不憂圖書四壁高枕秋
世人那識淮海士須行便爲名山留丈夫義豈
辱顏色使我摧眉去卽休安能訾呶向權勢咄
昔空令達者羞夙昔竟寥闊後來復決莽相看
一别兩墜天他時神劍來精爽旣言郊藪走麟
鳳朝廷寧得無吾黨卿也抽簪且偃仰漁陽日
影黯如靨薊門雪花大於掌馬上燕歌變徵聲
壺中酒盡君當往

俠客行爲子與贈吳生

本自吳越游俠人結交燕薊少年場長裾不曳

白雲樓詩卷之五
朱門裏樗蒲大叫青樓旁被酒目攝羽林騎擁
金作使邯鄲倡弟畜灌夫師事田光得意一言
失意一言相怨一方相慕一方男兒過逢好驚
座世事握齷寧陸梁姓名何惜借輕薄出處未
須論侯王親知猶向隅有錢徒充囊讎家猶戴
天有客徒滿堂猛虎可值俗子莫當平生片心
照秋水明日報恩還故鄉

留別子與

從君幾醉燕京酒舊遊花月回白首相看零落
眼中人二子河梁重携手憶昨青山坐西署于
今此事成不朽交態蕭條爾自諳浮名慘淡吾
何有爭道賢豪擁上林華陽臺館盡黃金長卿
詞賦徒壁立曼倩佯狂合陸沈平生得意向知
已常將顏色當同心北望諸陵一拊髀悲風千
里來寒陰春草如雲覆四野我行透遲五其馬
十載爲郎願已違出門况復悠悠者漢臣猶未
老馮唐每飯豈忘鉅鹿下歲晚江湖夢獨遙秋
深鴻鴈書堪把

白雲樓詩卷之五
十四
題申職方五嶽圖

誰將五拳石錯落余之堂坐看素壁纏雲霧安
得群峰掛屋梁更愁深林暝難入嵐影明滅侵
衣裳左眄欲生滄海日右臨少昊凝清霜掃練
白沙走朔漠回臺紫蓋垂炎荒須臾二室峻嶒
出杳然置我烟霞傍不聞吹笙控飛鶴浮丘子
晉俱冥茫良工拓筆天爲開長風西逐層陰來
中庭無人數移席巔厓乍墮松杉摧眼前突兀
太古色九州慘淡如浮埃宓犧神農未誕降元

氣始判洪濛哉大江浩浩黃河流巨野相望懸
莫秋異代猶探秦漢策眞形或結金銀樓憑軒
忽驚去千里青鞵竹杖胡在此復疑窈窕迷歸
路何當稅駕聊徙倚捲簾逾添空翠寒張鐙更
愛夕陽紫邢襄小吏困時名知君雅意憐泥滓
送永寧許使君二首

邢州十月凋白楊城頭出雲垂太行把酒相看
日欲墮五馬踟躕大道傍問君胡爲萬里去小
臣罪合投窮荒我聞西南羅施國風氣鬱塞殊

陰陽長官椎髻見朝吏海蠻醉鼓橐中裝男兒
買至二千石何地不可稱龔黃壯遊須令百粵
盡探竒更得浮沅湘永寧自惡無瘴癘明年雨
露生還鄉

其二

使君落魄高陽徒結交李生仍狂夫醉後裂眚
一相視怒髮上指浮雲徂白日竝堪出肝膽黃
金誰爲收泥塗長安少年太巧宦依倚權門何
事無失策始就公府辟得意豈領蠻夷符爾今
折腰揖下吏我更掩泣臨窮途竒數能令遇合
變美才常被功名愚武溪毒淫須自愛九重沈
深不可呼憶昔終軍繫南越鄉里小兒何其麤
荒服盡霑大漢德單車入郡歌來蘇固知永寧
之州纔如斗天子求賢三輔圖儻有徵書到遷
客五馬好過秦羅敷

送王給事使潞

憶昔胡塵暗薊門六軍如雲集闕下天子授鉞
臨軒檻宜陽王公其人者風流舊出城朔方簡

白雲樓詩卷之五
在新除大司馬是時將帥實跋扈傾耳履聲入
北斗引經答詔動稱意草檄提兵常在手帝力
自堪制閩外股肱佐命吾何有一從誅亂朝廷
清四海亦重尚書名看君少年青瑣客漢家今
得韋玄成袖裏彈章百不避囊中諫疏垂欲行
主恩三晉持節使上黨諸侯帶礪功泛槎春度
濁漳水設醴夜宴麇邠宮歸來煉石補造化論
思庭諍才何雄

郡齋同元美賦

夙昔紅顏一大夫乘輅河朔何爲乎除書歲下
不得調鼓其刀筆寧壯圖 帝恩初欲存折檻
謂爾祝網從皇都相逢但飲邢州酒太守况卽
高陽徒庭前秋色正慘淡囊裏新詩復有無醉
歌出塞雲中曲朔氣颯沓來飛狐路傍小臣久
淚沒安得座上開江湖眼前大雅竟誰是作者
如山道各殊更須一日論萬古揮毫振臂群雄
呼維時海內稱二子高名自喜王生俱白雪青
天動蕭瑟臺郎郡吏同崎嶇楚壁照隣不敢獻

蛾眉在宮還自塗王生仰視浮雲徂矯手將我
領下鬚與君周旋在今日還能百萬來長驅忽
然神氣回莽蒼孤城搖落相踟躕

跳梁行寄慰明卿

武昌季子吳國倫左遷三載匡廬春紅顏便着
風雲色白眼豈是功名人邢州太守昔入計猶
自金閨侍從臣顧問片言搖日月彈章一字動
星辰雖然舊屬平津吏常苦跳梁不可致調笑
縱橫倒四筵交驩往往非其意世間那得郢中

歌君但論詩吾且睡何須更比謝生有但應獨
把王郎臂蕭條頗似東方生南康郡裏憶承明
文彩縱然傾漢主恢諧難以取公卿畫眉石鏡
二女保濯足長江九派清此兒尋常未易識偷
桃賣藥行妖精近來猶尚憑陵否俯仰浮沈無
不有朝讀司空城旦書夜沽茂宰柴桑酒成敗
寧關達士心卷舒終在朝廷手隨他肉食作雄
飛饒我褐衣稱下走黨禁重開祝網年一時逐
客寵光偏晚收已抱泥塗恨更謫如何不可憐

事急誰能馳叩闕家貧未擬罷歸田再來地僻
逾高枕就使荒涼給俸錢壯遊萬里君須見青
瑣鳳池元不賤使氣能令魑魅藏出身曾厭攬
槍變楚狂豈止接輿賢秦孽猶堪背城戰回首
畏途真自知一官不絕纜如綫難將此物鬪翺
翔妬口含沙未可當四海弟兄堪並起中原我
輩正相望揔看棄置風塵裏不作踟躕道路傍
鼓枻更逢漁父笑豈應憔悴老滄浪

此兒行重寄明卿

我聞南康大如斗明卿佐理常什九昨日中丞
抗疏薦賢聲輒滿朝廷口豫章計吏入圖事愛
君未敢援以手小臣憐才上白狀相公良久疾
其首量移亦已從浩蕩不然徑逐此兒走誰知
片言觸忌諱畢竟功名成掣肘丈夫失意分自
當窮來傍人人避藏苦我折腰骨太勁看他伏
謁項能強縱令慢世無不可似爾干時豈所長
莫作拂衣少年態宦遊須使及春陽大舒楚歌
小舒舞是處江山好斷腸王郎至今棲北海帳

白雲樓詩卷之八
前萬騎綠沈槍

拂衣行答元美

五原驅車與殊淺三秦卧病秋云高束帶那能
見長吏談經何以隨兒曹上書一日報明主
願乞骸骨歸蓬蒿小臣采薪業不佞聞道巢由
亦已逝拂衣中原風雨來群公祖帳青門開二
疏一去三千載大夫未老寧賢哉新鄉城西重
回首當時叱馭其人走路傍伏謁莫敢動囊裏
俸錢君但取此輩交情雖可見吾徒大名終在
口于今偃息南山陲閉戶不令二仲知負海少
年大跋扈遣使問我抽簪期百爾不分一狂客
余髮種種何能爲玄經半卷常自誦濁酒千鍾
醉不疑五子江湖正漂泊黃鵠摩天慕者誰

答許右史二首

黃鬚芄芄田舍翁傾身坐向錢孔中長頰便便
美少年行步顧影私自憐誰知腐鼠能爲祟縱
是神仙有播遷使君似識浮雲意蹉跎實爲功
名利已拚酒隱當吾世潦倒佯狂百無已心濁醪

白雲樓詩卷之五
二十
恰供十日飲酣法須與常時異五斗乍可謂燥
吻飛觴二子雄相視醉殺不作傲杯人邇來那
得獨醒事魏文大白滿如月曾託屬車稱國器
若言此物非其任爾家破瓢亦應棄

其二

王門隱者身坎壈老叟長裾裾婀娜自言能料
一生事及至干時計常左從它慘淡復爲誰卽
得新詩題向我雨雪蓬蒿共三逕春色俛伶餘
藥裹濁醪但孰貧亦足微官纔罷病輒安胃中
壘塊故須澆乘興往來無不可白眼生成薄祿
相青山合就漁樵夥趙壹疾邪衆所擯鄒陽暗
投才應坐羨爾悠悠世上情回頭數子殊么麼

送萊蕪蕭簿

蕭生業本儒術起稍因讀法得其指栖息十年
白鹿洞擔囊一卷青烏子岱宗雄蟠大海濱衣
冠氣王中有人我家松檟三千樹鞍山東望華
不注爲說干時常轆軻獨憐明主能知遇萊
蕪作簿更誰群但恨無過范史雲金裏蠹魚堪

自見鞭下蟲蛆詎忍聞看君才豈催科拙請謁
公門非所屑藩臣答詔誤承恩翻然遂就遷官
列匹馬悠悠復路岐卽今失意欲何之同鄉冢
宰諳名姓府掾郎曹佇可期

歲杪放歌

終年著書一字無中歲學道仍狂夫勸君高枕
且自愛勸君濁醪且自沽何人不說宦遊樂如
君棄官復不惡何處不說有炎涼如君杜門復
不妨縱然踈拙非時調便是悠悠亦所長

贈殿卿

前年賜環承主恩去年解裾辭王門身經畏途
色不動心知世事口不論自顧平生爲人淺羨
君逃名我不免自憐垂老尚憑陵羨君混俗我
不能有酒便呼桃葉妓得錢卽飯蓮花僧

金吾行贈戴將軍

先皇諸將何其雄君家大人國士風賜錢留
嫖姚第詔宴數入蘭臺宮五雲忽變石城氣七
校親隨萬乘東當年帶礪山河在四海車書日

月通侍從敢聞潛邸事 朝廷竟錄代來功此
時十歲羽林孤躍馬能彎兩石弧漢主臨軒求
故劍承恩一拜執金吾生成燕頷寧辭武得奉
龍顏不羨儒三提鹵簿陪 陵寢再護樓船下
郢都禁中自失張安世天上還看周亞天

逼除過右史水村江山人同賦

夜來北渚北風急打頭雪花大如笠片紙東飛
右史書詰朝小作湖中集到門白鳥出高巢繫
馬南山送人入使君亭午未解醒肅客登筵一
長揖地僻兼無俗子妨樽空况有鄰家給意氣
還須我輩看功名但任兒曹立瞥眼旋驚青歲
徂霜屑莫放金杯澀世上悠悠已自諳卽今不
飲嗟何及醉聽楚調起寒雲絲筆憑陵朱絲濕
平生多少伯牙心此日因之寄篇什

賦得鴈池送許右史游梁分柰字

漢家藩國稱冠帶鴈池多暇爲高會賓序同推
枚叟尊星潢共指梁王大賦成錦字映長流酒
酣飛羽傳寒瀨藻翰常生授簡中潺湲不散鳴

箏外清影朝含竹苑霜悲聲夜雜吹臺籟白首
君恩豈稻梁朱門旅跡非蕭艾極知慕侶倦游
人秋來肺病誰能柰

白雪樓詩集卷之五

